

سبع جدور تفور

اكو مره حرمه • طلعت اتبيع الغزل يوم الجمعة بسوگك الغزل •
جاعليه رجال گلهه بيش الغزل گلتته ابهلگد • گلهه آني ما اريد الغزل
بس سمعت عندچ تلت بنات وآني ما عندي احد وحدي اريد بنيه من بناتيچ •
شافته رجال مهيب • وهمه فقراء ما عدهم ، گامت انطته بنيه
من بناته •

وصلت البنيه ورجلهه للبيت • دگت الباب صاحت الوصيفة منو
گلهه آني
فكت الباب بينت الوصيفة اخت الميتة ، وجهه اصفر وصوتهه
طامس اير •

گلهه جبتلچ بيبي ، گلتله اي اغاتي •
گعدت الزوجة • گام گلهه للوصيفة خيوط تعالي ، أجت گلهه
جيبلي الجراب •

جابتله الجراب ، طلع تلت حمصات انطه للوصيفة وحده وللعروس
وحده واله وحده اوگلهم كل وكت من اجي انطيكم وحده هندي ريوگك وغده
وعشه • ظلت سبع تيام ، غدت عوده اتجرهه من خشمهه تطلع روحهه •
صار نهار السبع تيام گلتله اريد اروح للحمام ، گلهه اي ميخالف •
اخذي هدومچ والوصيفة خيوط تشيلهن وياچ ، وهاچ هاي شاهيه انطي
للحمچية وجيبي الباقي •

طبت للحمام عسلت ولن طلعت انظنهم الشاهية وگلتلهم ، ايگول
رجلي انطوني الباقي •
گلتلهه الحمچية ملعونة الوالدين ، شنو شاهيه ، اخذت منهه البقجه
والزولية وطردهته •

جتي تبجي گلهه شبيچ ، گلتله اخذت هدومي والزولية وطردهته
أمام الحمام •

اخذهه ونزلهه للسرداب وعلگهه من ديوسهه لمن ماتت •

راح على أمهه • گلله شلونچ ، شلون كيفچ ، گلته على اللسهائنه
على بنته گلله گاعده ومرتاحة بس ترید اخته •

شالت اللخ وگلته اخذهه خل اتشوف اختهه وتبقه عدهه مدة • اخذهه
وگام سوه بالثانية مثل مسوه باختهه الاولية • راح على امهه وگلله بنتچ
زينات وگاعدات بس يردون اللخ ، الثالثة گلتهه الامهه شلون اذيني ،
مندري هذه شنو هوه ديو ، آفه ، اخاف ديكنلهن • اريدچ انكوليله تعال
بعد تلت تيام • گامت لبنيه سوت اكل ، دوله ، كباب ، كليچه واخذت
كلشي وراحت ، دك الباب صاحت الوصيفة خيوط ، منو كلهه آني
جبتلچ بيبي •

طلعت فكت الباب ، طبت شايله العكده ترید تمشي متگدر • گلله
خيوط جيبى الجراب • طلع تلت حمصات گلله هاچ ثلاثة الچ وهاي ثلاثة
الي وتلاثة لخيوط • گلته شدعوه ثلاثة ايصير مصرف عليك كل واحد
ياكل وحده •

گلله انتي مرتي ، انتي تصيرين زوجة الي ، وبعد مطلع طلعت
الاكل خلته بينه وبين الوصيفة واكلو ، تاكل الوصيفة اوتستراح وتگلله وديه
بيبي • فريب ميجي صمو الاكل • اندگت الباب گالت الوصيفة منو ،
بحيل گوي •

گال ايباه هاي نفسهه زين

ظلت تلت تيام راد يخلص الاكل گالت شسوي شلون اوهو گاعده
بجوله وماكو احد يمهم •

صعدت للسطح شافت کروان فايت سألتهم گلتهم اريد گصبه وگيره •
اظوهه وصلة گيره وگصبه • موعت الكيره وشچختهه براس الكصبه
وجتي للسرداب وچان مليون فلوس اکوام •• اکوام مدت الكصبه من الشباج
وگامت اتجر الفلوس •

گامت تنطي الفلوس للوصيفة وتجبلهه اكل وياكلون •

صارت سبع تيام گلتهه اريد ارواح للحمام • اخذت وياهه فلوس
وراحت ، واخذت منه الشاهيه •

لمن رجعت گلله ها •• گلتهه هاك هاي نص شاهيه اشدعوه شاهيه
كاملة • گلله انتي مرت دهرى ، انتي عيني ، انتي روجي • گام يطلع
فرحان ، فد يوم من الايام • طلبو منه جماعته وگالوله احنه عزمناك
هوايه وانته لازم تعزمنه •

گلهم ميخالف • راح للسوگ يسأل بيش اللحم يگلوه بعشرة ايصيح
بعشرة ، اللحم بعشرة يا ناس ويرجع يركض • ابروح علمامية يسأل بيش
الباميه يگلوه بخمسة يصيح بخمسه ، بخمسه ياناس ، شلون بخمسة •

مشه السوگك كله ، مگدر یشتری • شاف ولد جاهل بيده عصفور
كله يا ولد تبیع العصفور گام ایشگل یا هو ایشگل العصفور لو القرش ،
العصفور لو القرش ، مطّول اشتره للعصفور اوراح للبيت • گلله هاج
هذه العصفور سويه شگتین ، شگه سويه للخطار وشگه ضمیهه •
گلتله ای ، صدگك شدعوه •

طلع ، گامت وراه وراحت للسوگك وجابت كل الاشياء الموجودة •
تمن • لحم • مخضر • خبز وجابت الجذور ونصبتهن بالعكد وشعلت
النار وسوت الاكل وگامت اتخلي زعفران ودهن حر حته تطلع ريحة الاكل •
اجه گلله لیج هاي منین •

سبع جدور تفور من شگة العصفور ؟
وگف لسانه وصار اخرس •

گالت للجماعة ، انتو لتنقهرن اكلوا •

گام هوه یصیح ویأشر علی كل الجذور وكل ما بالبيت ولسانه اخرس
گالت للجماعة اشهدو علیه ایگول كل الحوش وما بیه الیج •

شهدو علیه وسجلو كلشي •

اومن قهره طلعت روحه ومات •

گاموا اكلو كلهم همه والفقراء بالطرف وجابت امهه وصار الحوش وما

بیه الیهه وچنه عدكم وجینهه •

هذه الحكایات روتها والدتي (ملكه الحاج حسن محمد علي)

وهي بلهجة بغداد الشائعة في المحلات التالية : الدشتي -

الهیناویین •